

# Et Jaor- en Produktverslag 2019

Stichting Stellingwarver Schrieversronte



## Stichting Stellingwarver Schrieversronte,

Willinge Prinsstraote 10,

8421 PE Oldeberkoop/Berkoop

### Saemenstelling van et bestuur en de direktie op 31 december 2019

Et bestuur bestaot uut: Klaas van Weperen (veurzitter, Oosterwoolde), Hendrik Fokkema (siktaoris, Sunnege), Olphert Smit (ponghoolder, Appelsche), Akkie Zeilstra (Raevenswoold), Jan Russchen (Oosterwoolde), Hans Salverda (Zorgvlied) en Geertje Otten (Dwingel).

De direktie is ienheufdig en de funktie van direktie wodt uitvoerd deur Sietske Bloemhoff, Ni'jberkoop.

### Rechtsvorm, statutaire naeme, vestigingsplak, doelstelling

De statutaire naeme ludet in artikel 1 Naeme en zetel: Stichting Stellingwarver Schrieversronte en et vestigingsplak is officieel Oosterwoolde, gemiente Oost-Stellingwarf. De doelstelling in de statuten is vaastelegd in artikel 2. Doel 1. *De Stichting stelt zich ten doel het Stellingwerfs als levende streektaal te handhaven en te bevorderen. 2. Zij tracht dit te bereiken door: a. het zelf uitgeven of doen uitgeven dan wel het bevorderen van het verschijnen van publicaties in het Stellingwerfs; b. het bevorderen van het gebruik van het Stellingwerfs als spreek- en schrijftaal in het Stellingwerfer taalgebied; c. het verzamelen, bewaren en ter inzage leggen van publicaties in het Stellingwerfs; d. het organiseren en bevorderen van bijeenkomsten, waarin het Stellingwerfs als voertaal wordt voorgestaan; e. bij te dragen aan de verbreiding van de kennis van en over het Stellingwerfs; f. bij te dragen aan het vastleggen, handhaven, zo mogelijk verlevendigen of doen herleven van oude gebruiken in de Stellingwerven; g. bij te dragen aan de verbreiding van kennis van de Stellingwerfer geschiedenis en folklore; h. het onderhouden en bevorderen van kontakten met personen, groepen en instellingen, die geacht worden het Stellingwerfs en de uitingen hierin te bevorderen of te willen bevorderen; i. alle andere wettige middelen, welke voor het doel der stichting bevorderlijk kunnen zijn.*



*Op 21 feberwaori, de Dag van de Memmetael, was de première van de eerste Stellingwarver speulfilm 'Daor klept de klokke weer!' Die feestelike gebeurtenis was in Filmhuus Slieker in Liwwadden. Daor was tegere mit et EBLT (Europees Buro veur kleine taelen), bewust veur keuzen omreden EBLT alle jaoren op die dag een filmaktiviteit organiseert bi'j Slieker. (Foto: Lenus v.d. Broek)*



# ET JAOR- EN PRODUKTVERSLAG 2019 VAN DE STICHTING STELLINGWARVER SCHRIEVERSRONTE

Veur bestuur en warknemers van de Stellingwarver Schrieversronte was et jaor 2019 een slim beweugen jaor. Dat kwam in et eerste plak deur de ziekte en daornao et uut de tied raeken op 17 april van heur zo trouwe en altied fleurige warknemer en kollega Immy Sloot uut Scharpenzeel. Mit mekeer hebben heur kollega's, bestuursleden van now en eerder op 24 april ofscheid van heur neumen tiedens de indrokkende ofscheidsdienst en begrafenis. Et kantoor bleef die weke dichte, daornao hebben oonze warknemers en vaaste vri'jwilligers de draod weer oppakt en mekeer in disse muulike tied geweldig steunen kund. Gedurende et hiele jaor 2019 hebben de vaaste vri'jwilligers Fettje Alten, Kiena Bouwer en Ankie Verbaan veul wark overneumen, totdat an et aende van et jaor Anneke Steenbeek uut Spange benuumd wodden kon veur 16 uren in de weke vanof jannewaori 2020.

Veur de Stellingwarver Schrieversronte hul de situaosie rond de subsidiëring van de stichting deur de drie overheden (de perveensie Friesland en de beide Stellingwarver gemienten) een kentering in. D'r wodde vaasteholen an de ni'je verdeling van de strukturele basissubsidie. Die was de laeste jaoren rond de € 135.000,- en zol vanof 1 jannewaori 2020 € 75.500,- op jaorbasis wodden. De votbezunigde € 60.000,- zol beschikber kommen veur projectsubsidies t.b.v. et Stellingwarfs. Deur genoeg projekten in te dienen zol dit bedrag op die wieze weer beschikber kommen kunnen. Liekewel ok ere instaantries kun projekten indienen, 'want iederiene moet een kaans hebben', zo is de gedaachte van de overheden. Veur disse ni'je wieze van subsidiëring zol de Regeling Stellingwerfs insteld wodden. Mit et Daegelijks Bestuur van oonze stichting, bestaonde uut Klaas van Weperen, Jan Ruschen en Victor Felder, is over de inhoud van disse ni'je regeling mit riegelmaat overleg west, mar uiteindelik zol de regeling an et aende van et jaor nog de hiel tied niet beschikber wezen.

De Regeling Stellingwerfs hooft in dat deur de overheden per projekt € 10.000,- beschikber steld wodden kan, een speciaole kemmissie bepaolt of een projekt daorveur wel of niet in anmarking kommen moeten zol. Dudelik wodde niet uut welke leden die kemmissie bestaon gaon zol. Per projekt wodt liekewel mar 1/3 deur de overheden subsidieerd, 2/3 van de kosten moet bi'j dadden (kulturele foonsen, instellings etc.) anvroegd wodden. Ien en aander hooft in dat oonze stichting vanof 2020 jaorliks veur € 180.000,- an subsidie 'binnenhaelen' moeten zol, om de eerdere € 60.000,- beschikber te holen veur et onderdiel projektmanagent. Daornaost meugen de uren die neudig binnen veur projektontwikkeling en de subsidie-anvroegen daorveur butendat niet uut de strukturele uren betaeld wodden, hoe dan wel is onduidelik. De Regeling Stellingwerfs zol uiteindelik op 18 feberwaori 2020 uut aende gaon; twie keer in et jaor zullen d'r 'tenders' wezen, perioden van elk een maond om projekten in te dienen. Nao de eerste tender zal d'r z.g.m. een Bestuurlik Overleg wezen mit et DB van de stichting. Et zal dudelik wezen dat veur et bestuur, et DB en de direktie in 2019 geweldig veul tied zitten gaon is mit overleg, kieken wat d'r kan wiels d'r nog niks dudelik is, en et veurbereiden van evt. projekten... Een teleurstellende en trieste wieze van ommeegaon deur de overheden mit kleine mar oe zo belangrieke instituten veur een belangriek diel van de perveensie. Et bestuur, de Raod van Advies, de direktie en warknemers blieven een had heufd holen in disse 'verni'jing' en wieze van haandelen deur perveensie en gemienten.

Et bestuur is bliede om ok positieve geluden heuren te laoten. Et konstateert dat d'r dit jaor weer flink veul wark verzet is veur et Stellingwarfs en de Stellingwarver streekkultuur. Zo was d'r an et begin van et jaor de première van de film 'Daor klept de klokke weer'. Veur die film, daor een grote groep vri'jwilligers uut et hiele gebied an mitdee, was d'r et hiele jaor deur veul ommedaenken in tal van dörpen. De film is veural bedoeld veur et basis- en vervolgonderwies. Goed om te konstateren is ok dat verscheiden schoelen kleinere of grotere taelprojekten organiseren, en gaf et Comprix College veur de dadde keer een kursus Stellingwarfs an de leerlingen van groep 8. Dit jaor konnen d'r ok twie kursussen Stellingwarfs uut aende gaon: de kursus 'Stellingwarfs veur beginners' en de 'Verdiepingskursus Stellingwarfs'. Dit is een ontwikkeling daor et bestuur slim mit inneumen is.

Dit jaor wodde d'r ok stevig deurwarkt an de uitgeveri'je van de stichting, Et Boekefoons. Meerdere boeken konnen verschienen, en veur een tal boeken wodde dat meugelik maekt deur subsidies van kulturele foonsen. Zoks is veural van belang veur boeken mit arg interessaante taelkundige en/of historische onderwarpen, mar waarvan ok bekend is dat d'r gien duzenden exemplaoren van verkocht wodden zullen. Zokke uitgiften bin liekewel van belang veur et vergroten en uutbreiden van infermaosie over de streekkeigen onderwarpen. Van belang bin zokke uitgiften ok veur de toekomst, veur et onderwies en veur ammeteur- en professionele onderzokers liekegoed as veur de interesseerde inwoners.

Van belang vint et bestuur ok de grote inzet veur et Kenniscentrum, et ienige centrum in zien soorte angaonde de eigen tael, streekkultuur en geschiedenis van Stellingwarf. Veur et digitaliseren van veul biezonere kollekties

zetten heur meerdere vri'jwilligers wekeliks in. Deur heur wark wodt de webstee stellingia.nl mit riegelmaat van ni'je infermaosie veurzien. Hiel veul meensken maeken van disse webstee gebruik, zodat dudelik is dat de Stellingwarver Schrieversronte ok op et gebied van achtergrondinfermaosie angaonde de eigen tael en streekkultur in een belangrieke vorm van tael- en kulturoverdracht veurzicht.

Tot slot nuumt et bestuur hier nog naodröckelik et belang van de veerdere erkenning van et Nedersaksisch, zoas daor in oktober 2018 een konvenaant veur tekend is deur et Riek, de Nedersaksische perveensiaole overheden en de Stellingwarver gemienten. Opvalend blifft de opwardering van de eigen tael, veural ok deur jongeren. Butendat kwammen verschillende saemenwarkingsverbanden mit ere Nedersaksische taelinstituten op gang, zoas de overkoepende stuurgroep Nedersaksisch waar ok de Schrieversronte in vertegenwoordigd is.

### **Verslaglegging**

Veur de financiële verslaggeving van de Stichting Stellingwarver Schrieversronte en van de Stichting Et Boekefoons zorgde Accon AVM in Drachten.

### **Saemenstelling bestuur**

Et bestuur bestuurt op heufdlijnen, neffens et principe cultural government. De direktör adviseert et bestuur over inhooldelike zaeken en ontwikkelt et ni'je warkplan, dat deur et bestuur vaastesteld en dat vervolgens veurlegd wodt an o.e. de subsidiegevers (de beide Stellingwarver gemienten en de perveensie Friesland). Et bestuur vergeerderde in et verslagjaar zeuven keer.

### **Saemenstelling bestuur in december 2019**

**Veurzitter:** Klaas van Weperen (Oosterwoolde)

**Siktaoris:** Hendrik Fokkema (Sunnege)

**Ponghoolder:** Olphert Smit, (Appelsche)

**Leden:** Geertje Otten (Dwingel); Jan Russchen (Oosterwoolde); Hans Salverda (Zorgvlied); Akkie Zeilstra (Raevenswoold)

### **Passeniel**

De overlegstruktuur binnen de organisaosie is as volgt: ien keer in zes weken is d'r warkoverleg, wanneer d'r anleiding veur is hebben de veurzitter, een lid van et bestuur en de direktör een veuroverleg veur de bestuursvergeerdering.

### ***In dienst in et verslagjaar:***

Sietske Bloemhoff, direktör 24 uren, Stellingwarfs binnen hiemkunde 8 uren

Saskia Douma, 8 uren kennis- en dokumentaosiecentrum

Ninke van der Veen, 4 uren in de maond, webmaster

Deur trieste omstaandigheden mos et wark van Immy Sloot overneumen wodden deur een drietal vaaste vri'jwilligers: Fettje Alten, Kiena Bouwer en Ankie Verbaan.

### ***Vaaste vri'jwilliger:***

Janet Donker, huushoodelike dienst, 3 uren.

### ***Vri'jwilligers:***

Veur de Stellingwarver Schrieversronte zetten heur jaarliks, op wat veur meniere dan ok, zoe'n 175 personen in.

### **Raad van Advies**

De Raod van Advies wodde begin 2017 insteld en bestaot uut de volgende leden: Arie den Blanken (Makkinge), Henk Bloemhoff (Oosterwoolde), Titia Bijwaard (Ni'jtriene), Ype Dijkstra (Oosterwoolde), Victor Felder (Oosterwoolde), Jan Haveman (Emmen), Lutz Jacobi (Wergea) en Geert Lantinga (Wolvege)

## **Kemmissies en warkgroepen**

Binnen de Stichting Stellingwarver Schrieversronte funksjoneeren de folgjende kemmissies:

### ■ **warkgroep kursusleiding Stellingwarfs veur beginners**

(Henk Bloemhoff, Ageeth Bos en Mark van Veen)

### ■ **warkgroep verdiepingskursus Stellingwarfs**

(Henk Bloemhoff en Mark van Veen)

### ■ **veldnaemekemmissie**

(de kemmissie komt bi'j mekeer wanneer neudig; koördinaosie Henk Bloemhoff)

### ■ **redaktie De Ovend**

(Kjest Herder, Jan Koops; buroredakteur Sietske Bloemhoff)

### ■ **saemenstelling jaorlikse kelender**

(Sietske Bloemhoff)

### ■ **sutelaktiekemmissie**

(Kiena Bouwer, Sietske Bloemhoff)

### ■ **warkgroep Publiciteit**

(Jan Baas, Gerrie Koopstra, Anneke Koopstra, Baukje Krediet, Akkie Zeilstra)

### ■ **kemmissie Stellingwarver streeknaemen op 'e kaorte**

(Geert Lantinga, Henk Bloemhoff (koördinaosie); disse kemmissie komt bi'j mekeer wanneer neudig)

### ■ **warkgroep Stellingwarfs Meziekfestival**

(Klaasje Herder, Kjest Herder, Piet Tjassing, Sietske Bloemhoff)

### ■ **warkgroep Dokumentaasiecentrum/Kenniscentrum**

(Fettje Alten, Hendrik Betten, Kiena Bouwer, Saskia Douma (buro), Jaap Elzenaar, Kjest Herder, Kees Koopstra, Ankie Verbaan, Sietske Bloemhoff (koördinaosie))

### ■ **warkgroep rouwverwarking**

(Grietje Bosma, Attie Nijboer)

### ■ **redaktie radiopergramme In Twielochten**

(Kjest Herder, Sietske Bloemhoff)

### ■ **warkgroep netuurekursies**

(Hans Lanting, Harm Smid, Andries van der Veen, Freddie de Vries, Sietske Bloemhoff)

## ■ **Warkgroep De Lende**

(Henk Bloemhoff, Geert Lantinga, Meindert Schroor, Jan Slofstra, Dennis Worst, Jan Slofstra, Sietske Bloemhoff)

## **Vertegenwoordigers**

De Stichting Stellingwarver Schrieversronte is vertegenwoordigd in:

- **et bestuur van de Stichting Sont** (dr. Henk Bloemhoff)
- **literaire warkgroep 'Alles rondom taal', Stichting Kunstwerf** (Sietske Bloemhoff)
- **pergramme advies lekaole omroep Odrie** (Henk Bloemhoff)
- **warkgroep H.J. Bergveldpries** (Sietske Bloemhoff, adviseur)
- **EBLT (Europees Buro veur Kleine Taelen)** (Jelke Nijboer)

## **Social media**

### **Webstee [www.stellingwarver-schrieversronte.nl](http://www.stellingwarver-schrieversronte.nl)**

Dit is et pertaol, de toegangspoort, waor alle websteden van de Stellingwarver Schrieversronte onder valen of nog onder valen gaon.

### **Webstee [www.stellingwarfs.nl](http://www.stellingwarfs.nl)**

De algemiene webstee van de Stichting Stellingwarver Schrieversronte wodt aktueel holer deur et buro. Henk Bloemhoff is op vri'jwillige basis webredakteur. Webmaster is Ninke van der Veen.

### **Webstee [www.stellingplus.nl](http://www.stellingplus.nl)**

De webstee [www.stellingplus.nl](http://www.stellingplus.nl) wodde veerder uutbouwd deur webmaster Ninke van der Veen. De koördinaosie van de warkzigheden d'r veur en de webredaktie wo'n verzorgd deur Sietske Bloemhoff.

### **Webstee [www.stellingia.nl](http://www.stellingia.nl)**

De koördinaosie van Stellingia.nl - dat is et digitaole kenniscentrum van de stichting - is in hanen van Sietske Bloemhoff, wiels vri'jwilliger Ankie Verbaan de verschillende artikels op de webstee plaetst. Et bouwen en veerder ontwikkelen van de webstee gebeurt deur webmaster Ninke van der Veen.

### **De Kienderwebstee**

De Kienderwebstee is bedoeld as webstee waor kiender heur thuis mit vernuveren kunnen. De webstee is nog in opbouw; veur de inhoud zorgt vri'jwilliger Kiena Bouwer. Webmaster is Ninke van der Veen.

### **Webstee [www.stellingwerf-heemkunde.nl](http://www.stellingwerf-heemkunde.nl)**

Sund 2017 het de Stellingwarver Schrieversronte et beheer over disse speciaole webstee veur et basisonderwies in de Stellingwarver gemienten. Webmaster is Ninke van der Veen.

### **Webstee [www.de-veerkieker.nl](http://www.de-veerkieker.nl)**

Veur et biezondere hiemkundeprjekt De Veerkieker is een appatte webstee ontwikkeld. De artikels wo'n plaetst deur Marjolein Spitteler, webmaster is Ninke van der Veen.

### **Twitter**

Et Twitteraccount van de stichting wodt op vri'jwillige basis aktueel holer deur Henk Bloemhoff.

### **Facebook**

Op Facebook wo'n wekeliks twee berichten plaetst deur Sietske Bloemhoff.

## PRODUKTVERSLAG 2019

### A 1. INFERMAOSIE, ADVIES EN PUBLICITEIT

#### Infermaosie

In et verslagjaor wodde weer flink wat infermaosie verstrekt angaonde veul onderwarpen waar de stichting aktief mit doende is of mit uut aende gaon zal. In de verschillende media, niet aliend in et gebied zels, mar ok daar ommetoe, verschenen d'r een flink tal passeberichten. Dat gul veur alle (boek)uutgiften, mar liekegoed veur alle ni'js rond de veerdere ontwikkeling van bi'jglieks et Kenniscentrum en de bi'jheurende webstee stellingia.nl. Ok veur alle aktiviteiten, die vaeks in gezaemelikhied mit ere instellings of verienings organiseerd wodden, was d'r in de media een protte ommedaenken. Infermaosie wodt ok meerdere keren in et jaor verstrekt via de lekaole omroepen in Stellingwarf.

#### Advies

Zowat daegeliks wodt d'r tillefonisch of via de sociaole media om raad of advies vraogd op et gebied van mit naeme de tael, mar ok van de kultuur en de geschiedenis. Dat gelt niet aliend veur de bewoners uut de regio, mar de vraogen kommen liekegoed van bedrieven, (onderwies)instellings, verienings en overheden. De Stellingwarver Schrieversronte bliekt altied weer hiel leegdrumpelig: meensken kommen ok gewoon even an as ze wat weten willen... Dat gefft mitien an dat veul meensken een hiele goeie biening hebben mit et instituut en de meensken die d'r warken. Op dit plak numen we even de extra hulpe die oonze stichting verliert an bi'jglieks begraffenisondernemers: bi'j heur is een speciaol nommer bekend veur in de aovenduren of in et weekaende. Zoks gefft an dat de Stellingwarver Schrieversronte, ok op sociaol gebied, een belangrieke rolle veur de hiele Stellingwarver gemienschap as dienstverlienende instaansie waar et gaot om vraogen over de tael, de streekkultuur en de Stellingwarver geschiedenis.

#### Publiciteit

Veur alle boekuutgiften, kursussen en aktiviteiten wodt veur veul publiciteit zorgd. Dat gebeurt uteraord deur berichten te sturen naor de verschillende kraanten, tiefschriften en lekaole omroepen, mar nog veul meer wodt inzet op publiciteit via websteden, facebook en twitter. Dudelik is dat et gebruik van de 'social media' de hieltied intensiever wodden is en dat daormit een veul groter pebliek berikt wodt. Veur et veerder uuldregen en gebruiken van et Stellingwarfs is mit naeme Facebook van groot belang. Veul reakties op de berichten bin in et Stellingwarfs, en somstieden kommen d'r daordeur vraogen op 'e lappen angaonde spelling of taelkonstrukties.

Veur publiciteit zorgt ok een groep vri'jwilligers deur infermaosie te geven op tal van marken en bi'jienkomsten. Naost de verkoop van boeken en infermaosie daarover is d'r ok ommedaenken veur o.e. et kursuswark van de stichting.

### A 2. KENNISCENTRUM

#### Algemien

Et Kenniscentrum van de Stellingwarver Schrieversronte is een uniek centrum veur de Stellingwarver gemienten. Op gien eer plak is zoveul infermaosie te vieren over - in et eerste plak - de tael, as in dit centrum. Al vanaf de oprichting van, eerst de verieninge Stellingwarver Schrieversronte, in 1972 wodde begonnen mit et opzetten van een streekarchieff. In et eerste plak zol et gaon om et verzaemelen en beweren van gegevens, artikels, opnaemen etc, over de tael. In et tweede plak gong et liekewel ok om streekgerichte onderwarpen en de geschiedenis. Deur de jaoren henne wodden ok deur pattedelieren biezondere kollekties binnenbrocht, zodat in roem 45 jaor tied een unieke verzaemeling an streekgeschiedenis in et gebouw van de stichting beweerd wodt. Veur veul kollekties geldt dat die aliend bi'j de stichting in Berkoop beheerd wodden meugen, zol dat om wat veur reden niet meer kunnen, dan gaon ze weeromme naor de eigener of evt. naor naobestaonden. Veul (biezondere) kollekties, teksten, boeken en geluudsmateriaol wo'n sund 2012 deur een vaaste groep van vri'jwilligers herorganiseerd en digitaliseerd. Et digitaliseren is bedoeld om alle materiaol goed veur de toekomst te beweren, mar ok t.b.v. de speciaole webstee veur et Kenniscentrum **www.stellingia.nl**. As alles

uut et Kenniscentrum scand en invoerd is gaot et om meer as 100.000 titels. Veur de wieze waarop ien en aander opzet is en uitvoerd wodt het de stichting advies had van veurmaolig perveensiaal archiefinspekteur Jetze Dijkstra. Intied bin op Stellingia al veul artikels, boeken en kollekties plaetst. De webstee is now al een biezuudere en unieke webstee, die mit naeme veur leerlingen van et vervolgonderwies, studenten Nederlaans en geschiedenis, historici en ammeteur-historici van groot belang is. De koördinaosie van de warkzemededen veur et Kenniscentrum en Stellingia was weer in hanen van Sietske Bloemhoff. Twie keer in et jaor wodt mit de vri'jwilligersgroep de staand van zaeken van et halfjaor daorveur deurpraot en de taeken veur et volgende halfjaor vaastesteld.

### Herorganiseren en digitaliseren

In 2019 gong mitwarkster Saskia Douma deur mit et herorganiseren van et Kenniscentrum. Ze kon daor weer acht uren in de weke an besteden en kon zo weer een hiele slag maeken. Naodat bepaolde katteregienien opni'j inricht en vaastesteld binnen kan et materiaal kodeerd en digitaliseerd wodden. Et koderen gebeurde, op angeven van Saskia Douma, deur vri'jwilliger Fettje Alten. Vervolgens bin de verschillende verzaemelings en kollekties digitaliseerd deur de vri'jwilligers Kiena Bouwer, Kjest Herder en Ankie Verbaan. Veur et plaetsen van de verzaemelings en kollekties die veur Stellingia binnen, zorgde Ankie Verbaan. Veul berichten in de media wodden t.b.v. et Kenniscentrum ok dit jaor weer vergeerd deur vri'jwilliger Kees Koopstra. Hendrik Betten gong veerder mit et digitaliseren van geluudsbanen en video's; een tal daorvan bin in 2017 en 2018 op Stellingia plaetst. Bi'j et Kenniscentrum wodden opni'j biezuudere kollekties inbrocht, zoas de boeken en tidschriften van de iemkersverieninge van West-Stellingwarf. Daormit is de biezuudere kollektie an boeken, tidschriften en fotomateriaol angaonde de iemkeri'je opni'j gruuid. Disse biezuudere kollektie is iene van de grootste van et laand op et gebied van de bi'jeholderi'je. In 2019 het vri'jwilliger Jaap Elzenaar disse kollektie veerder beschreven en digitaal verwarkt.

Et gruuien van et tal kollekties, mar ok alle ni'je anvullende infermaosie die binnenkomt zorgen d'r veur dat beide kluzen vol raeken. Daoromme is in 2018 ruimte vri'jmaekt en kregen de kollekties van et Dörpsarchief van Berkoop, die an now toe ok in die kluzen onderbrocht wodden, een eer plak in et paand.

### Bezoekers an de haandbiebeltheek en et kenniscentrum

Ok dit jaor was d'r weer riegelmaotig bezuuk van personen die materiaal raodplegen wollen in et Kenniscentrum. Belangstellenden veur tael en historie kun gebruik maeken van de daorveur inrichte studiekaemer om de gegevens uut o.e. de haandbiebeltheek en et Kenniscentrum in te zien. De boeken uut de haandbiebeltheek en et Kenniscentrum, mar ok de speciaole kollekties, foto's, geluudsmateriaol etc. wo'n niet uutliend. In dit verslagjaor weren d'r weer mit riegelmaot vraogen van studenten en leerlingen van et vervolgonderwies. Vaeke is dan al infermaosie haeld van de websteden **stellingwarfs.nl** en **stellingia.nl**. Veul interesseerden kun now thuus alvast een indrok kriegen van wat d'r in et Kenniscentrum te vienen is an inhoodelike infermaosie. Et tal vraogen dat via internet en tillefoon binnenkomt was dit jaor opni'j roem boven de driehonderd.

**Beriek: roem boven de 500 personen**



*De kursus Stellingwarfs veur beginners wodde o.l.v. Freddie de Vries wodde in april ofsleuten mit een exkursie op 'e Delleboersterheide bi'j Berkoop. In november zol een ni'je groep kursisten uut aende gaon. (Foto: Lenus v.d. Broek)*



## B. EDUKAOSIE

### B 1. KURSUSSEN VEUR VOLWASSENEN

In et verslagjaar wodden de volgende kursussen holen:

#### 1. Kursus Stellingwarfs veur beginners

Naodat in et veurjaar de kursus van et seizoen 2018-2019 mit 11 dielnemers ofsleuten wodde, gong in 2019 een ni'je kursus uut aende. Veur disse kursus gavven acht meensken heur op. De kursus wodde veur de vierde keer in een dörp anbeuden; dit keer wodde de kursus heben in et Comprix College in Oosterwoolde. De kursusleiding beston dit keer uut dr. Henk Bloemhoff, Ageeth Bos en Mark van Veen. **Dielnemers: 8**

#### 2. Verdiepingskursus Stellingwarfs

Vanwegens nogal wat belangstelling wodde in 2019 sund jaoren de Verdiepingskursus Stellingwarfs geven. An disse kursus, waarbi'j dieper op de tael ingaon wodt, mar waor ok de kennis die opdaon is in de beginnerskursus nog even an de odder komt, deden negen meensken mit. De kursus wodde geven deur Henk Bloemhoff, Geert Lantinga, Mark van Veen en Dennis Worst. **Dielnemers: 9**



*Alle zeven leerlingen van et Comprix College die de Kursus Stellingwarfs volgden slaegden veur heur examen en kregen een mooi diploma uutrikt. (Foto Lenus v.d. Broek)*

#### 3. Kursus Stellingwarfs leerlingen Comprix

Zeven leerlingen van et Comprix College slaegden op 9 april veur heur examen van de kursus Stellingwarfs. Die kursus wodde tiedens et schoelejaar 2018-2019 geven; de ontwikkeling van de kursus gebeurt deur docente Ageeth Bos i.s.m. mit de Stellingwarver Schrieversronte. Et examen wodde verzorgd deur Ageeth Bos, Grietje Bosma en Sietske Bloemhoff. **Dielnemers: 7**

#### 4. Voegelkursus

In saemenwarking mit de Stellingwarver Schrieversronte organiseerde Freddie de Vries van Hooltpae een kursus over voegels in Stellingwarf, inklusief een eksursie. **Dielnemers: 20**

#### 5. Digitale kursus Stellingwarfs

Dit verslagjaar wodde now en dan op vri'jwillige basis veerder warkt an de opzet veur een digitale kursus Stellingwarfs. Op de webstee StellingPlus bin daor al wat onderdielen van plaetst. Op die wieze kun liefhebbers d'r alvast mit an de slag veurdat de hiele kursus klaor is en anbeuden wodt.

## B 2. HIEMKUNDE

In 2019 wodden acht uren in de weke besteed an de ontwikkeling van Stellingwarfstaelig en hiemkundig lesmateriaol veur et vak Hiemkunde in et basisonderwies in de gemienten Oost- en West-Stellingwarf. Mit Stichting Comprix (eupenbaor onderwies), Stichting De Tjongerwerven (kristelik onderwies) en vertegenwoordigers uut et onderwies wodt elk jaor gezaemelik een jaorwarkplan opsteld.

### *Meertmaond-streektaelmaond*

Op verzuuk van basisschoele de 'Heidepolle' in Wolvege wodde in saemenwarking mit die schoele een schoelebried projekt rond de Stellingwarver tael ontwikkeld. Veur alle groepen wodden speciaole lessen mit tal van verschillende onderwarpen klaormaeft, en ok veur et grootste pat uitvoerd. Om et projekt meugelik te maeken was d'r de mitwarking van acht vri'jwilligers. Et projekt wodde een groot sukses, zodat besleuten wodde et 'Stellingwarver Taelverhael' veerder uut te warken en vervolgens an te bieden an de ere basisschoelen. In 2020 zal et aanbod op de webstee veur hiemkunde plaetst wodden, mit et te downloaden lesmateriaol.



*Stellingwarver teniel van Jaap Sikkema, en verhaelen van Johan Veenstra in et 'Stellingwarver Taelverhael'*

### *In et verslagjaor wodde veerder zorgd veur et volgende lesmateriaol:*

#### ■ *Veur groep 1 t/m 4:*

Veur de groepen 1 t/m 4 bin een tal ni'je Stellingwarver verhaelties schreven of vertaald. De verhaelen mit bi'jheurende opdrachten bin te downloaden op de speciaole hiemkunde-webstee, die ansluten bi'j bepaolde thema's of streektaelprojekten op verschillende basisschoelen. D'r is veerder warkt an et digitaliseren en toegankelijk maeken van eerder ontwikkeld lesmateriaol t.b.v. de speciaole hiemkunde-webstee. Ok an et nog toegankelijker maeken van de webstee, die ondertussen een belangrieke rolle speelt in et aanbod van lesmateriaol, is deurwarkt.

#### ■ *Veur groep 5 t/m 8:*

Veur de groepen 5 t/8 bin d'r ni'je Stellingwarver verhaelen schreven of vertaald. Alle ni'je materiaol is, of zal, te downloaden wezen op de speciaole webstee veur hiemkunde. In 2019 bin opni'j exkursies orgeniseerd naor netuurgebieden in de woonomgeving van de leerling, en ok exkursies angaonde de geschiedenis van et eigen dörp. D'r is veerder warkt an et digitaliseren en toegankelijk maeken van eerder ontwikkeld lesmateriaol t.b.v. de speciaole hiemkunde-webstee. Ok an et nog toegankelijker maeken van de webstee, die ondertussen een belangrieke rolle speelt in et aanbod van lesmateriaol, is deurwarkt.

### *Webstee Hiemkunde*

An de verni'jng van de webstee [www.heemkunde-stellingwerf.nl](http://www.heemkunde-stellingwerf.nl) wodde in 2019 veerder warkt. Et is een hiele ni'je webstee, omreden de oolde niet meer voldee an de eisen van de tied. In overleg mit de schoelebesturen en de leerkrachten is veur een hiele ni'je indieling zorgd. Oolder lesmateriaol dat eerder ontwikkeld is en nog altied graeg bruukt wodt, wodt deur een vri'jwilliger van de Stellingwarver Schrieversronte digitaliseerd. In 2019 is veerder onderzuuk daon naor de meugelikheden van zelsstaendig te verwarken taellessen op [heemkunde-stellingwerf.nl](http://heemkunde-stellingwerf.nl). Te verwaachten is dat disse lessen in 2020 plaetst wodden zullen. De webstee wodt beheerd deur de stichting, webmaster is Ninke van der Veen.

## DE VEERKIEKER



*De Veerkieker zorgt d'r veur dat tiedens heur basisschoeleperiode alle leerlingen jaorliks een eksursie maeken naor een kultuurinstituut. De instituten bieden tegere mit keunsteners warkwinkels an; de warkwinkel Tael-meziek bi'j de Stellingwarver Schrieversronte is iene van de achte. Et doel van De Veerkieker is dat kiender nao acht jaor basisinderwies ok weet hebben van wat d'r an kultureel arfgoed in heur leefomgeving is.*

In 2019 bin weer een flink tal warkwinkels 'Tael en meziek' verzorgd binnen et schoelebriede projekt 'De Veerkieker'. De warkwinkel wodt geven deur Bas van Domburg (meziek), Sietske Bloemhoff (tael, eerste halfjaor) en Elizabeth Bergsma (tael, twiede halfjaor) die de warkwinkel ok ontwikkelden. Vanof et schoelejaor 2019-2020 is De Veerkieker struktureel binnen et basisonderwies opneumen en komt in alle warkwinkels et Stellingwarfs an de odder; alle Stellingwarver basisschoelen zollen zo an alle warkwinkels mitdoen gaon. Veur et mitontwikkelen van Stellingwarfstaelig les materiaal veur alle groepen zette Sietske Bloemhoff heur in, in overleg mit Comprix binnen heur ontwikkelingsuren veur Hiemkunde.

### B 3. TOMKE

In meie verscheen veur de twaelfde keer de Stellingwarver edisie van *Tomke*. Tomke is de naeme van een leesbevodderingspergramme veur ukken in Frieslaand, dat in een saemenwarkingsverbaand mit de Afûk ontwikkeld wodt. Veur de Stellingwarver vertaeling zorgde Sjoukje Oosterloo. Van et Stellingwarver Tomke-boekien wo'n ieder jaor 1000 exemplaoren drokt, alle ukken in de Stellingwarver kriegien et boekien deur de Schrieversronte ommenocht anbeuden. **Beriek: omdebi'j 900**

Dit jaor wodde veur de tiende keer mitdaon an et veurleesprojekt Tomke dat in juni holen wodt. Zowat alle ukkespeulgroepen en plakken veur kienderopvang in Stellingwarf doen hier an mit. Zoe'n twintig vri'jwilligers zetten heur hierveur in. De koördinaosie wodde verzorgd deur de vri'jwilligers Wikje Haan en Akkie Zeilstra. De aktie wodt in gezaemelikhied uitvoerd mit 'It Selskip foar Fryske tael en schariftekennisse'. Rond de 800 ukken kommen zo mit et Stellingwarfs in anraeking. **Beriek: omdebi'j 900**

### B 4. E-LEARNING STELLINGWARFS

An disse kursus wodt in 2019 deur vri'jwilligers veerder warkt. Een diel van de internetkursus zal nauw ansluten bi'j de kursus 'Stellingwarfs veur beginners' zoas die al sund jaor en dag geven wodt. Dit projekt wodt middels een appatte financiering orgeniseerd.



## C1. PUBLIKAOSIES

In 2019 konnten de volgende uitgiften verschienen:



### 1. De Ovend

In 2019 verscheen de 48<sup>e</sup> jaorgaank van et tiedtschrift *De Ovend* mit zes nummers. Alle zes nummers van *De Ovend* telden 32 bladzieden in een oplaoge van 1000 stoks. De redaktie beston uut Kjest Herder en Jan Koops, wiels de bureoredaktie en et korrektiewark in hanen was van Sietske Bloemhoff. De vormgeving van et tiedtschrift wodde uutbesteded an Bauke Visser Koenders van Haulerwiek. Opvalend is hoeveul wardering d'r veur et blad is. Opvalend is ok dat et blad arg veul uutliend wodt, zodat et bi'j veul meer meensken bekend is as allieend de leden. Et tiedtschrift wodt drokt en verstuurd deur Pijper Media in Grunningen.




### 2. Vroeger is veurgoed veurbi'j

Naodat dit boek van Johan Veenstra in 2018 verscheen in een oplaoge van 800, raekte et in 2019 uutverkocht. Van dit boek verscheen daaromme in 2019 een herdruk van 500 stoks. Ok van et boek 'De Friese Waterlinie', van dr. Meindert Schroor zol een herdruk verschienen. Besleuten is om vanwegens et veerdergaonde onderzuuk angaonde de pesisie van Stellingwarf in die periode van doe en daornao om mit een hiele ni'je uitgiften te kommen. Die het as warktitel 'Het grensland Stellingwarf'.




### 3. Et evangelie neffens Markus

Vanuut de grondtekst et Grieks zorgden dr. Rienk Klooster, Jan Koops en Erica Plomp-Den Uijl veur een Stellingwarver vertaeling van et evangelie neffens Markus. Dit gebeurde mit naeme om taelkundige redens. Veur et omslag zorgde Sietske Bloemhoff en veur de vormgeving Bauke Visser Koenders. Et boek wodde drokt deur Printbase bv in Suintjehannesge. Oplaoge: 300 stoks.



### 4. Luudklokken en klokkestoelen in Stellingwarf

In dit boek wo'n alle luudklokken en klokkestoelen beschreven die in Stellingwarf veurkommen en veurkommen hebben. Veul gegevens weren tot dislange onbekend, zodat dit boek een unieke aanvulling is op de riegel boeken over de geschiedenis van Stellingwarf. Veur et onderzuuk, de tekst en de ofbelings zorgden Jan Koops en Sietske Bloemhoff. De vormgeving was ok bi'j dit boek in hanen van Bauke Visser Koenders, et boek wodde drokt deur Printbase in Suintjehannesge. Oplaoge: 500 stoks.



### 5. De wereld van Zander

*De wereld van Zander, herinneringen van de vrome landverhuizer Zander Jacobs Klooster (1820-1906) uit Donkerbroek'* verscheen van de hand van dr. Rienk Klooster uut Liwwadden. Behalven dat et boek vertelt uut et dagboek van Zander over die zien leven as laandverhuizer en over zien persoonlijke geleufsontwikkeling is et boek biezunder interessant angaonde zien gebruik van et Stellingwarfs uut die tied. Veur de vormgeving van et boek zorgde Bauke Visser Koenders van Haulerwiek, et boek wodde drokt deur Printbase in Suintjehannesge. Oplaoge: 300 stoks.





### 6. Stillestaon en weer deurgaon

De gedichten in 'Stillestaon en weer deurgaon' van Grietje Bosma en Attie Nijboer gaon over verlös en rouw, mar veural ok over hoop. De gedichten bin bedoeld om troost en steun te bieden en om verlös te verwarcken en om mit rouw omme te gaon. Veur et omslag en de vormgeving zorgde Sietske Bloemhoff i.s.m. Bauke Visser Koenders. Et boek wodde drokt deur Printbase bv in Suntjehannesge. Oplaoge: 300 stoks.



### 7. Aeventuren van Piepmoes


Omreden de feguur Piepmoes en die zien aeventuren nog altied geliefd binnen bi'j kiender van vier tot achte is in 2019 begonnen mit een ni'j boek. In et boek krigt de moes en zien kammeraoden te maeken mit alderhaande situaosies en onderwarpen in zien leefgebied Stellingwarf. Tekst, omslag en vormgeving zorgt Sietske Bloemhoff veur i.s.m. Bauke Visser Koenders. Et boek wodt drokt deur Printbase bv in Suntjehannesge. Oplaoge: 300 stoks.

In et verslagjaor wodde deur de vier auteurs deurwarkt an et boek *Wateren, een oase van weldaad*. Deur alderhaande oorzaeken is et boek nog niet klaor, mar verschient now veur de sutelaktie van 2020. Datzelde gelt veur et boek *Veldnaemen van Stellingwarf diel VIII: Peperge, De Blesse en Blesdieke*, deur Otto de Vent m.m.v. Henk Bloemhoff.

### 8. Stellingwarver Zaeken

Veur de regionaole kraanten *Nieuwe Ooststellingwerver* en *Stellingwerf* wodde elke twie weken zorgd veur de bladziede *Stellingwarver Zaeken*. Et redaktie- en korrektiewark veur disse ni'js- en verhaelebladziede is in hanen van Sietske Bloemhoff, vaaste mitwarkers weren Roely Bakker, Henk Bloemhoff, Harmen Houtman, Jaap Sikkema, Sjoukje Oosterloo en eren. De kraanten wo'n huus-an-huus bezorgd; deur et tal reakties is et is opvalend hoeveul de rebriek lezen wodt.

### 9. Radiopergramme In Twielochten



In oktober gong et wekelikse radiopergramme 'In twielochten' uut aende. Dat is de naeme van een hiel ni'j Stellingwarfs radiopergramme dat deur de beide lekaole omroepen Odrie (Oost-Stellingwarf) en Radio Centraol (West-Stellingwarf) wekeliks uutzinnen wodt. In et pergramme is d'r ommedaenken veur de tael en de streekkultuur. Alle keren bin d'r literaire bi'jdregen en d'r bin mit riegelmaat interviews. Et pergramme is een produktie van de Stellingwarver Schrieversronte, et wodt prissenteed deur Kjest Herder en Sietske Bloemhoff. An et pergramme leveren 14 meensken bi'jdregen.

## C 2. TAEINSTIMULERENDE EN AANDERE AKTIVITEITEN

In 2019 bin weer verschillende taelstimulerende en aandere aktiviteiten ofsleuten en ni'je op gang brocht:

### 1. Aktiviteiten

- Op 7 en 8 feberwaori wodde de jaarlikse veurleesaktie veur bewoners van de Stellingwarver zorginstellings en verpleegtehuizen en De Menning in Wilhelminaoord holen. Veur et slaegen van disse slim wardeerde aktie zorgden dit keer twintig vri'jwillige veurlezers. **Belangstellenden: ongeveer 250**
- Op 14 feberwaori wodde in Liwwadden bi'j de ofsluting van et LF2018-projekt 'Under de toer' o.e. de rok uut et lekaosietheater De Verdwenen Peerden prissenteeerd. **Belangstellenden: 200 (volle zael)**
- Op 21 feberwaori was in Filmhuus Slieker in Liwwadden de prissentaoisie van de eerste Stellingwarver speulfilm 'Daor klept de klokke weer'. De aovend wodde organiseerd deur EBLT i.s.m. de SSR. **Belangstellenden: 150 (volle zael)**
- Op vri'jdag 22 feberwaori was d'r in MFC 'De Ni'je stienze' van Ni'jhooltpae een kulturele aovend bi'j gelegenheid van et verschienen van et ni'jste boek van Harmen Houtman. Et eerste exemplaor van 'As ik kiezen moch...' was veur Ype Dijkstra, de vroegere veurzitter van de SSR. Veur Stellingwarver lieties zorgde Lammy Bruyns. **Belangstellenden: volle zael**
- Op 26 feberwaori wodde een prissentaoisie holen van Stellingwarfs lesmateriaol tiedens een onderwiesbi'jienkomst veur et Nedersaksische gebied in Ommen. **Belangstellenden: Nedersaksische instituten**
- Op vri'jdag 22 maart was d'r in et Buurthuis van Noordwoolde de vertoning van de film 'Daor klept de klokke weer' veur alle mitwarkers en geneudigden. **Belangstellenden: 150**
- Op 9 april deden zeuven leerlingen van et Comprixkollege van Wolvege examen Stellingwarfs bi'j de Schrieversronte in Berkoop. Alle kursisten slaegden mit goeie risseltaoten. D'r wodde mitien een rondleiding holen in et gebouw. Veur de uutslog van et examen was veul en veural positieve belangstelling. **Belangstellenden: 7**
- Veur de twaelfde keer organiseerde de Stellingwarver Schrieversronte in de eerste weke van juni de Tomke-veurleesweke in zowat alle ukkespeulplakken en plakken veur kienderopvang in de beide Stellingwarven. Zoe'n twintig vri'jwilligers zetten heur in veur disse taelstimulerende aktie, die koördineerd wodt deur de vri'jwilligers Wikje Haan en Akkie Zeilstra. In anraeking mit et Stellingwarfs kommen zo omdebi'j **900 ukken**
- Op 8 juni ston et gebouw van de Schrieversronte in et teken van et bridgeweekaende bi'j Hotel Lunia. Dielnemers an et weekaende kwammen zo ok in de kunde mit et wark van de Stellingwarver Schrieversronte. **Belangstellenden: 100**
- Tot juli wodde was d'r in de grote zael een tentoonstelling mit wark van Annie Ligthart uut Oosterwoolde. Veur disse dadde tentoonstelling van Ligthart bi'j de SSR was opni'j flink belangstelling en wodde mit riegelmaat tiedens kantooruren bezocht. **Belangstellenden: omdebi'j 75**
- Op 20 juli wodde de tentoonstelling mit wark van keunstener Dick Bakker uut Ooldetriene eupend. De tentoonstelling duurde tot halverwege oktober. Veur de tentoonstelling, mit schilder'i'jen van veural netuurgebieden in West-Stellingwarf, was veul wardering. De tentoonstelling vul in de periode van keunstrouet 'Eupen Stal'. **Bezukers: rond de 6.000**
- Op 2 september gong de 45e sutelaktie uut aende. De sutelaktie wodde eupend deur de veurzitter van de Schrieversronte, Klaas van Weperen. Jaorliks bin zoe'n 80 vri'jwilligers betrokken bi'j de organisaosie van de de sutelaktie om daor een sukses van te maeken. Mit de sutelaktie wo'n jaorliks **roem 16.000 meensken** benoederd en kommen (opni'j) in de kunde mit et Stellingwarfs.

- In september zollen de eerste opvoerings op schoelen wezen van et theaterverhael rond de Friese Waeterlinie. Omreden d'r uiteindelik niet voldoende financiële middels van dadden toezegd wodden is keuzen veur een simpeler theaterverhael. Mit de schoelen is overlegd en ofpraot dat de eerste opvoering in 2020 wezen zal. Wel wodde zorgd veur verwerkingsmateriaol, dat is intied plaetst op de webstee veur Hiemkunde.
- Op 15 september dee de gemiente Oost-Stellingwarf opni'j mit an de Eupen Monementendag. Ok de Stellingwarver Schrieversronte hadde disse dag, tegere mit et Dörpsarchief van Berkoop, de deuren los en vertelde de bezukers o.e. de klokkestoelen van Stellingwarf. **Belangstellenden: omdebi'j 40**
- 15 september was ok et begin van een biezondere tentoonstelling rond de klokkestoelen van Stellingwarf. In de hal were de miniaturen van alle klokkestoelen te zien; die wodden indertied maekt deur Aaldert Alten van Noordwoolde t.b.v. et vak hiemkunde in et basisonderwies. In de zael weren o.e. bouwtekenings van klokkestoelen te zien. Veur de tentoonstelling, die tiedens kantooruren te bezichtingen was, was veul belangstelling en wardering. **Belangstellenden: omdebi'j 100**
- Op 20 september verscheen tiedens een biezondere prissentasie et boek 'Luudklokken en klokkestoelen van Stellingwarf' in et Karkehuus van Else. Et is een hiel ni'j boek wodden as vervolg op et eerdere boek 'Klokkestoelen van Stellingwarf'. Ni'j is et diel over de luudklokken deur Jan Koops; et diel over de klokkestoelen wodde herschreven deur Sietske Bloemhoff. Tiedens de middag was d'r extra ommedaenken veur de klokkestoelen en luudgewoonten in Else. **Belangstellenden: omdebi'j 40**
- Op woensdag 16 oktober was in Zwolle de Nedersaksische bi'jienkomst mit et Committee of Experts van de Raod van Europa. Om de peer jaor is d'r overleg en uutwisseling angaonde et naokommen van de doelen die angeven binnen in diel 2 van et Europees handvest veur regionaole en minderhiedstaelen uut 1998. **Dielnemers: vertegenwoordigers Nedersaksische taelinstituten**
- Vanof half oktober was d'r een tentoonstelling van Jeltje Baas van De Oosterstreek. De schilderes exposeerde veur de twiede keer bi'j de Schrieversronte; dit keer hadde ze een keuze maekt uut heur wark van koenen. De exepisioe was te bezichtigen tiedens kantooruren. **Belangstellenden: omdebi'j 75**
- Op 15 november verscheen in Donkerbroek et biezondere boek 'De wereld van Zander' van dr. Rienk Klooster. De auteur gaf zels een interessaante inleiding over de feguur Zander, en over hoe hi'j mit die zien dagboek in de kunde kommen was. Interessant was ok et verhael van dr. Henk Bloemhoff over et Stellingwarfs dat de Donkerbroekemer Zander indertied, zo in de eerste helte van de 19e ieuw, brukte. In die tied was Donkerbroek nog overwegend Stellingwarfstaelig.
- Op 16 november wodde in De Rustende Jaeger in Hooltpae et Stellingwarfs Meziekfestival holen. Dit keer was de groep dielnemers kleiner as de veurige keren. Ok kwam d'r minder pebliek op of, zodat de veurbereidende warkgroep kieken zal naor een ere invulling van et festival. **Belangstellenden: 30**
- Op 16 december wodde bi'j RTV Drenthe in Beilen de Nedersaksische tael-app 'Woordwies' prissenteeerd. Oonze stichting leverde daor krek as de ere taelinstituten 3000 woorden veur an, de koördinaosie en uutvoeringg wodde uutvoerd deur et Drentse Huus van de Taol. Mit de tael-app hopen de instituten dat veul, mit naeme jongeren, berikt wodden.
- Dit jaor wodde deur theatermaeker Mariken Biegman warkt an een ni'j theaterprojekt, naodat eerder heur kwaliteiten bewezen weren as artistiek leider van et theaterprojekt 'De Verdwenen Peerden'. Deur wat tegen-slag mit et op gang kommen van et artistieke diel, zullen pas in 2020 de drie opvoerings rond et thema 'Vrede en vri'jhied' wezen.
- Deur et hiele jaor henne prissenteeerde de Schrieversronte in zo'e'n twintig dörpen de film 'Daor klept de klokke weer'. Ieder keer was daor een vri'jwilliger bi'j die ok an de film mitdaon hadden en die et pebliek van aorige achtergrondinfermasioe veurzag. Veur disse prissentasies was overal veul belangstelling en wardering, zodat mit mekeer op disse wieze al gauw tegen de 2000 personen berikt wodden. **Belangstellenden: tegen de 2000 personen**

## 2. De websteden [www.stellingwarver-schrieversronte.nl](http://www.stellingwarver-schrieversronte.nl), Facebook en Twitter

### *Stellingwarver-schrieversronte.nl*

Stellingwarver-schrieversronte.nl is et pertaol van de websteden van de Stellingwarver Schrieversronte. Systeembeheerder van alle websteden is Albertjan Leupen, webmaster van alle websteden is Ninke van der Veen.

### *Stellingwarfs.nl*

De redaktie van de algemiene webstee Stellingwarfs.nl ([www.stellingwarfs.nl](http://www.stellingwarfs.nl)) wodt op vri'jwillige basis verzorgd deur Henk Bloemhoff.

**Tal unieke bezukers in 2019: 5.895**

### *Stellingplus.nl*

In 2019 warkte webmaster Ninke van der Veen vier uren in de maond an et veerder uitbouwen van de verschillende websteden van de stichting. De webstee [www.stellingplus.nl](http://www.stellingplus.nl) is mit naeme bedoeld veur een bried aanbod op et gebied van de Stellingwarver streektael en streekkultuur. Mit naeme de rebriek 'Stellingwarfs in 't wild' is een rebriek daor veul naor keken wodt. De redaktie van StellingPlus wodt verzorgd deur Sietske Bloemhoff. **Tal bezukers in 2019: 3.899**

### *Stellingia.nl*

De webstee [www.stellingia.nl](http://www.stellingia.nl) is et digitale Kenniscentrum van de Stellingwarver Schrieversronte. In et verslagjaar wodden niet alliend opni'j boeken digitaliseerd en plaetst, mar ok een tal biezondere kollekties en onderwiesmateriaol. **Tal bezukers in 2019: 2.393**

### *Kienderwebstee.nl*

De Kienderwebstee wodde deur een vri'jwilliger an deurwarkt, mar is nog in ontwikkeling. De webstee is bedoeld veur kiender die ok thuus es even kieken willen naor wat d'r veur heur in de omgeving gebeurt en wat d'r te doen is. **Tal bezukers in 2019: 294**

### *Stellingwarfs-heemkunde.nl*

Halverwege 2017 wodde et beheer van disse speciaole webstee veur et Stellingwarver basisinderwies onderbrocht bi'j de Stellingwarver Schrieversronte. **Tal bezukers in 2019: 2.521**

### *Deveerkieker.nl*

De webstee die infermaosie gef t.b.v. et onderwiesprojekt De Veerkieker gong in 2017 uut aende. **Tal bezukers in 2019: 2.394**

### *Facebook*

Sund begin 2015 het de Stellingwarver Schrieversronte ok een eigen Facebookbladziede. Twie keer in de weke wo'n daor sund die tied de laeste berichten op plaetst deur Sietske Bloemhoff. Et bliekt dat de hieltied meer meensken mit Facebook berikt wodden. Soms gaot et om over de 3.000 personen die op disse wieze mit et Stellingwarfs en de aktiviteiten van de Stellingwarver Schrieversronte in anraeking kommen.

### *Twitter*

De Stellingwarver Schrieversronte maekt ok gebruik van Twitter; mit naeme om belangrieke berichten die op kotte termien bekend wezen moeten deur te geven.



## C 3. ONTWIKKELINGSUREN NI'JE DOELGROEPEN

In 2019 wodde weer mit tal van verschillende ere instellings saemenwarkt.

### 1. Alles rondom taal

Tegere mit Klaasje Herder (biebeltheken Oost-Stellingwarf) en Femke Adams (boekhaandel Bruna) vormt Sietske Bloemhoff de literaire warkgroep *Alles rondom taal*. Die warkgroep, die onderdiel is van Stichting Kunstwerf, organiseerde in de kienderboekeweke van 2019 rond et thema 'Reizen' warkwinkels et maeken van 'verhaelevatorlieders'.

### 2. Saemenwarking mit Afûk

*Tomke*

Ok in 2019 kon deur een goeie saemenwarking over en weer et boekien veur ukken *Tomke* verschienen. De Stellingwarver Schrieversronte verspreidt et boekien ommenocht onder alle (zoe'n 900) ukken van Stellingwarf. Veur de vertaeling zorgde opni'j Sjoukje Oosterloo.

### 3. Saemenwarking mit Tresoar

Dit jaor hulp de Stellingwarver Schrieversronte mit an et projekt rond et verschienen van een perveensiaole literaire kaorte. Dat gul mit naeme veur et korrektiewark van de Stellingwarver teksten op die kaorte.

### 4. Saemenwarking mit Fryske Akademy

Tiedens een overleg in 2012 angaonde meer saemenwarking, wodde doe konstateerd dat op et gebied van et wetenschappelik onderzuuk d'r zeker meugelikheden weren. Et risseltaot is dat in de twiede helte van 2013 dr. Henk Bloemhoff ansteld is bi'j de FA as gaastonderzoker lexikografie en veldnaemkunde. Ok in 2019 warkte Bloemhoff veerder an o.m. de digitalisering van et Stellingwarfs Woordeboek.

### 5. Saemenwarking mit ere Nedersaksische taelinstituten en SONT

Mit de ere Nedersaksische streektaelinstellings van Noordoost-Nederland en Stichting SONT was d'r dit jaor ok now weer mit een zekere riegelmaat kontakt. Dat kontakt was d'r mit naeme angaonde de staand van zaecken rond de veerdere erkenning van et Nedersaksisch.

### 6. Stuurgroep Nedersaksisch

Mit de ere Nedersaksische instituten is nao de ondertekening van et konvenant erkenning Nedersaksisch in 2018 ofpraot saemen te warken, daar waar et kan. Daorveur wodde in 2019 een overkoepelende stuurgroep opricht mit van elk deur een overhied subsidieerd taelinstituut een vertegenwoordiger. Veur et Stellingwarfs is dat Sietske Bloemhoff.

### 7. Onderwieswarkgroep Nedersaksisch

Om dezelde reden as bi'j punt 6 angeven wodde ok een Nedersaksische onderwieswarkgroep insteld. Veur et Stellingwarfs is Sietske Bloemhoff, as ontwikkeler en saemensteller Stellingwarfs lesmateriaol veur et basisonderwies, vertegenwoordiger.

### 8. Saemenwarking mit EBLT

Mit et Europees buro veur kleine taelen (EBLT) is d'r mit riegelmaat kontakt. Behalven dat EBLT et wark van de SSR ondersteunt, en daar waar et neudig is van goeie raod veurzicht, is d'r now en dan ok saemenwarking. An et aende van 2018 wodde besleuten om de eerste Stellingwarver speulfilm te prissenteren op de Dag van de Memmetael op 21 feberwaori.

### 9. Saemenwarking mit Historische Verienings

Mit de Historische Verienings was d'r in et subsidiejaor minder saemenwarking as in et jaor d'r veur. Ien en aander hangt of van de projekten of aktiviteiten waar men doende mit is.

## D 1. BESTUURS- EN ORGANISAOSIE-ONDERSTEUNING

Veur de bestuurs- en organisaosie-ondersteuning zorgt de direkteur van de stichting. Dat betekent in de praktijk dat et bestuur goed op de hoogte hopen wodt mit de lopende aktiviteiten en de ni'je plannen. Zo is d'r maondeliks een ofstemmingsoverleg mit de veurzitter en ponghoolder, d'r wodt zorgdreugen veur et veurbereiden van de bestuursvergeederings en de jaorvergeederings, en d'r wodt zorgd veur et leggen van de neudige kontakten mit de overheden en ere subsidiegevers.

De direkteur gefte uteraord ok de daegelikse leiding an et ere passeniel van de stichting, ien keer in de maond is d'r een warkoverleg. Daarnaast wodt veur de neudige koördinaosie zorgd van alle vri'jwilligersaktiviteiten.

Om de organisaosie goed dri'jen te laoten, wodden daor in et verslagjaar meer as 16 uren in de weke an besteded.

## D 2. VRI'JWILLIGERSAKTIVITEITEN

### 1. Kenniscentrum

Dit verslagjaar beston et tal 'vaaste' vrijwilligers veur et Kenniscentrum opni'j uut zeuven meensken. Mit vaaste vri'jwilliger wodt bedoeld dat meensken ien of meer dagdielen naor de instelling kommen en heur inzetten veur de Stellingwarver Schrieversronte. De groep zet him mit naeme in veur et herorganiseren van et Kenniscentrum, et digitaliseren daorvan en et plaetsen van et digitaliseerde wark op de webstee Stellingia.nl. Vanof jannewaori 2015 bin de ciefers angaonde de unieke bezukers van de ni'je webstee bi'jholen. **Beriek: 1.850 personen**

### 2. Sutelaktie 2019

De sutelaktie van 2019 brocht een bedrag op van krapan € 7.250,- . De sutelders verkochten opni'j goed, mar mit naeme deur ziekte konnen d'r dit keer nogal wat minder meensken mitdoen, zodat et eindbedrag leger was as de laeste twe keer. Per kroje wodt liekewel nog de hieltied veur etzelde bedrag an boeken, cd's en kelenders verkocht. **Beriek: roem 16.000 personen**

### 3. Boeekraante 'Twe pond 'n stuver

De warkgroep Publiciteit zorgde weer veur genoeg adverteerders om de jaorlikse boeekraante in een oplaoge van 22.500 stoks verschienen te laoten. De huus-an-huuskraante in Oost- en West-Stellingwarf verscheen veur de 37e keer en beston uut zestien bladzieden. Et redaktiewark wodde, krek as veurgaonde jaoren, uutbesteded. In de kraante is d'r alle keren veul ommedaenken veur de ni'jste uutgiften, mar d'r bin ok altied interviews mit o.e. schrievers in opneumen. **Beriek: roem 50.000 personen**

### 4. Stellingwarver Spreukekelender

In meie verscheen bi'j uitgeveri'je Van de Berg in Almere de Stellingwarver Spreukekelender veur et jaor 2020. Omdat de redaktiekosten deur die uitgeveri'je dreugen wodden, bestedet de Schrieversronte gien uren an dit taelbevodderende projekt. De kelender wodde saemensteld deur Sietske Bloemhoff, die van een flink tal vaaste mitwarkers ofwisselende kopie kreeg. Die mitwarkers in 2019 weren Roely Bakker, Koosje Hornstra, Harmen Houtman, Kees Koopstra, Attie Nijboer, Sjoukje Oosterloo en Jaap Sikkema. **Beriek: 2.500 personen**

### 5. De ledestaand

De ledestaand per 31 december 2019 is 740.

## ET JAOR- EN PRODUKTVERSLAG 2019 VAN DE STICHTING ET BOEKEFOONS

Stichting Et Boekefoons,  
Willinge Prinsstraote 10,  
8421 PE Berkoop/Oldeberkoop

### Saemenstelling bestuur in december 2019

<b>Veurzitter:</b>	Klaas van Weperen, Oosterwoolde
<b>Siktaoris:</b>	Hendrik Fokkema, Sunnege
<b>Ponghoolder:</b>	Olphert Smit, Appelsche
<b>Leden:</b>	Geertje Otten, Dwingel, Jan Russchen, Oosterwoolde; Hans Salverda, Zorgvlied; Akkie Zeilstra, Raevenswoold
<b>Direktie</b>	De direktie is ienheufdig en de funktie van de direktie wodt uutvoerd deur Siets- ke Bloemhoff, Ni'jberkoop

### Statutaire naeme, vestigingsplak, doel

De Stichting Et Boekefoons wodde opricht op 1 oktober 1986 en kent as vestigingsplak Oosterwoolde, gemeente Oost-Stellingwarf. Doel is neffens artikel 2 van de Stichting: *1. De stichting stelt zich ten doel het Stellingwerfs als levende streektaal te handhaven en te bevorderen. 2. Zij tracht dit te bereiken door: a. het zelf uitgeven of doen uitgeven dan wel het bevorderen van het verschijnen van publicaties in het Stellingwerfs; b. het bevorderen van het gebruik van het Stellingwerfs als schrijftaal in het Stellingwarver taalgebied.*

In et jaorverslag 2004 is uutlegd waaromme as de stichting destieds opricht is. De Stichting is verantwoordelik veur de uutgifte van boeken in et Stellingwarfs en van boeken over Stellingwarf, et Stellingwarfs en alle regionaole kultuuruterings. De Stichting kan ok de saemenwarking zuken mit aandere uitgevers om publikaosies gezaemelik uut te geven of om publikaosies van aandere uitgevers te distribueren of om publikaosies van aanderen publicitair te ondersteunen.

In et jaorverslag van de Stichting Stellingwarver Schrieversronte 2019 kan onder de heufdstokken C Publikao-sies (en dan mit naeme 2. Et uitgeven van boeken) en D Vri'jwilligersaktiviteiten (en dan mit naeme sutelaktie, boekekraante en Stellingwarver spreukekelinder) lezen wodden welke aktiviteiten deur de Stichting Et Boekefoons in 2019 t.b.v. de Stichting Stellingwarver Schrieversronte uutvoerd binnen.

### Financieel risseltaot

Et risseltaot van alle investerings en inspannings van de beide stichtings in 2019 is een konsolideerd positief risseltaot van € 859,-